

元史新編

元史卷七

成宗

成宗皇帝諱鐵穆耳世祖之孫裕宗眞金第三子也母曰
徽仁裕聖皇后弘吉刺氏至元二年九月庚子生三十年
受皇太子寶撫軍於北邊明年春正月世祖崩親王諸大
臣遣使告哀軍中夏四月壬午帝至上都左右部諸王畢
會先是御史中丞崔彧得玉璽於故臣之家其文曰受命
於天既壽永昌上之徽仁裕聖皇后至是手授於帝甲午
卽皇帝位受諸王宗親文武百官朝於大安閣詔曰朕惟
太祖聖武皇帝受天明命肇造區夏列聖相承光熙前緒
迨我先皇帝體元居正以來文物典章大備臨御三十五
年薄海內外罔不臣屬宏規遠略厚澤深仁有以衍皇元

萬世無疆之祚我昭考早正儲位德盛功隆天不假年四海缺望顧惟眇質仰荷先皇殊眷往歲之夏親授皇太子寶付以撫軍之任今春宮車遠馭奄棄臣民乃有宗藩昆弟之賢戚畹官僚之舊謂祖訓不可以違神器不可以曠體承先帝夙昔付託之意合辭推戴情切意堅朕勉徇所請於四月日卽皇帝位可大赦天下尙念先朝庶政悉有成規惟愼奉行罔敢失墜更賴宗親勳戚左右忠良各盡乃誠以輔台德追尊皇考曰皇帝尊母元妃曰皇太后庚子遣攝太尉兀都帶爲大行皇帝請諡於南郊志作甲辰日事此告天請諡之始定諸王駙馬賜與依往年大會例賜金一者加四爲五銀一者加二爲三戊申太白晝見己酉雲南行省以所定路府州縣來上上路二下路十一下州四十

九中縣一下縣五十授金齒土官阿魯爲孟定路總管五月庚戌朔太白犯輿鬼壬子祭太陽太歲火土等星於司天臺紫微星於雲僊臺戊午上大行皇帝尊諡曰聖德神功文武皇帝廟號世祖并上世祖后尊諡曰昭睿順聖皇后又上皇考尊諡曰文惠明孝皇帝廟號裕宗四川散毛洞主覃順來貢升其洞爲府己巳改皇太后所居舊太子府爲隆福宮詹事院爲徽政院乙亥命札散知樞密院事加御史大夫月爾魯太師知樞密院伯顏太傅樞密副使月赤察爾太保戊寅立捕鹽人賞格六月庚辰朔日食庚寅減雲南歲貢馬復以鐵木爾平章政事甘肅饑禁釀酒乙未以加上尊諡詔天下免所在本年包銀俸鈔及內郡地稅江淮以南夏稅之半己亥封乳母楊氏爲趙國安翼

夫人何氏爲翼國夫人辛丑禮宋使家鉉翁遣還家

鉉翁充祈

請使至燕安置河間至是年踰八十乃賜衣遣歸

甲辰詔修世祖實錄丙午太陰

犯井秋七月己未立保定路之博野泰安州之新泰平陽

路之武鄉芮城陵川蒲縣改侍衛都指揮使爲隆福宮左

右都威衛使王戊詔中外崇奉孔子

寧獻王所著通鑑博論于至元十八年有

云帝信桑門之惑盡焚中國道藏闕儒道二教爲外學貶孔子爲中賢尊桑門爲正道及攷元史止于是年焚燬道書至於孔子則至元四年卽詔修曲阜孔子廟五年又詔中外崇奉孔子各建學校祀先聖大德六年又詔建文宣王廟於京師崇奉備至何得爲此言此殆宋之遺民所誣謗也至大德十一年加上孔子尊號制詞宏雅古今傳頌自古尊崇先聖未有過於元代者戊辰罷肇州宣慰司入遼東道減八番

等處所設官二百一十六員

八番新附時稱九十萬戶設官四百二十四員及遣官覈

實止十六萬五千餘戶故減其半

癸酉以不忽木段眞竝平章政事詔諭

暹國王敢朮丁來朝或有故則令其子弟及陪臣入質命

太師月爾魯將兵守北邊八月庚辰太白晝見戊子初祀社稷用堂上樂歲以爲常己丑遣范文虎監浚通惠河立新河運糧千戶所戊申太陰犯畢太白犯軒轅九月丁巳太白經天丙寅太陰掩填星辛未犯軒轅乙亥犯平道遣圖古等使閣藍冬十月辛巳詔凡蠲免田租令佃戶應輸田主者亦如所謂之數毋得私收壬午太白犯左執法癸巳太陰掩填星乙未犯井金齒孟愛甸渠長遣子來朝卽其地立軍民總管府辛丑詔京畿糧儲充足歲海運米百萬石者今減十之七帝諭省臣曰中書職務卿等皆懷怠心又不約束吏曹使選人淹滯桑葛雖姦邪然僚屬憚其威政事無不立決卿等其約束曹屬有不事事者笞之乙巳遣南巫里速木荅刺繼沒刺子毳陽使者各還國

初征瓜哇

時嘗招瀕海南巫里等國遣人來附以十一月丁未朔帝
禁商泛海甯京師至是弛海禁始遣還朝皇太后於隆福宮上玉冊玉寶己酉太陰犯亢壬子罷
江淮湖廣江西行樞密院并入行省庚申太陰犯畢令河
西僧人依舊助役毀宣政院所刻河西藏經板甲子以何
瑋參知政事罷海北海南市舶提舉司立覆實司癸酉太
白犯房詔改明年爲元貞元年十二月癸未歲星犯房丁
亥犯鉤鈴壬辰太陰犯鬼庚子犯房又犯歲星用帝師奏
釋京師大辟三十人杖以下者百人賜諸鰥寡貧民鈔二
百錠曲靖激江昔安等路夷官各以方物來貢是月太傅
伯顏卒

元貞元年乙未春正月癸丑命只爾合朗爲御史大夫乙
卯太陰犯填星及畢壬戌以國忌卽大聖壽萬安寺飯僧

七萬詔道家復行金錄科範乙丑以行院既罷仍賜行省

長官虎符領其軍庚午以楊炎龍爲中書左丞阿老瓦丁

呂天麟並參知政事壬申立北庭及曲先塔林二都元帥

府癸酉歲星犯東咸罷瓜沙二州屯田二月丁丑翰林學

士承旨畱夢炎請老厚賜遣之壬午罷江南茶稅增鈔三

千錠入江西歲額

令有司勸茶戶種茶以時采摘仍禁放牧損壞

癸未熒惑犯太

陰戊子思州田曷刺不花雲南夷卜木四川洞主查閭王

金齒帶梅混冬等來覲壬辰太陰犯平道癸卯犯歲星敕

廉訪司官令省臺同選三月乙巳朔發鈔五萬錠市馬給

貧乏軍庚戌太陰犯填星壬子禁來朝官斂所屬俸錢戊

午罷福建徽州銀場提舉司以東作方殷停諸不急營造

壬戌地震太陰犯房丙寅增置蒙古學正以各道廉訪使

領之夏四月敕上都大都揚州從前撥賜大乾元寺大興教寺大護國仁王寺酒店湖泊出辦錢物仍聽官收分給毋許僧道私設人員庚寅太陰犯東咸癸巳遣烏撒同知牙那木假兵部尙書使馬荅兒的陰庚子立衛候掌謁掌儀掌膳諸司及宮正內宰隸隆福宮癸卯設各路陰陽教授試選陰陽教授占算星命周易六壬數學仍禁陰陽人不得游諸王駙馬之門閏月癸丑歲星犯房甲寅太陰犯平道乙卯犯亢丁巳掩房己未罷打捕鷹房總管府及司籍周用薄斂等庫爲皇太后建佛寺於五台山立校釐招討司蘭州河清三日上下三百餘里五月庚辰詔各省存儒學提舉司一其餘悉罷升江南諸縣爲州以戶爲差戶止四五萬者爲下州五萬以上者爲中州下州官五員中

州官六員凡爲中州者二十八下州者十五又以連州戶
不及額降路爲州辛巳罷行大司農司加麥朮丁平章軍
國重事何榮祖爲昭文館大學士議中書省事甲申免自
今五月以前逋欠錢糧丁亥太陰犯南斗六月壬子世祖
實錄成甲寅并左右兩江宣慰宣撫二司爲廣西兩江道
宣慰司都元帥府治靜江仍分司邕州癸亥立蒙古軍都
元帥府於西川徑隸樞密院庚午立西域衛親軍都指揮
使司敕凡上封事者命中書省發視然後上聞秋七月乙
亥準江南地稅輸鈔丁丑太陰犯亢己卯詔舉中外儒吏
兼通者每道歲貢二人省臺立法攷試中程者用之所貢
不公罪舉者甲申歲星犯房八月己酉太陰犯牛壬子犯
壘壁陳己巳以駙馬那懷知樞密院事九月乙亥用帝師

奏釋大辟三人杖以下四十七人已卯運米十萬石於榷
場故廩以備北塞省寧夏行省入甘肅甲午太陰犯軒轅
戊戌犯平道冬十月癸卯有事於太廟帝曰親享之禮祖
宗未嘗舉行朕將躬祀之命獻官迎導入廟奉世祖裕宗
冊寶納諸各室甲寅敕自今監察御史廉訪使有所按覈
州縣官與本路同鞠路官與宣慰司同鞠宣慰司官與行
省同鞠辛酉辰星犯房壬戌犯鍵閉戊辰太白晝見太陰
犯房十一月甲戌太白經天立江浙金銀洞冶轉運司乙
酉太陰犯井丁亥犯鬼戊戌升江西寧都會昌二縣爲州
十二月丙辰太陰犯軒轅甲子犯天江丁卯禁諸王駙馬
輒召有司官吏減海運工費鈔一貫每石計六貫五百文
著爲令是月立皇后伯岳吾氏

一作伯岳吾氏
要眞氏初命郡縣通祀三

皇如釋奠宣聖禮

通攷云元貞間建三皇廟內有三皇并歷代名醫像東有神機堂內置銅人錢

災圖二十有四凡五臘旁注爲溪谷所會各爲竅以導其源委又刻鍼灸經于石其碑之題篆則宋仁宗御書至元

開自汴

移此是歲帝以京師米貴益廣糶法設肆三十所發米

七萬石糶之後增至四十萬石每爲豪強巧取乃命有司籍貧民戶數驗口給之減時值三之一

二年丙申春正月己卯上思州叛賊黃勝許攻剽水口思

光寨湖廣行省調兵擊破之勝許復入交趾壬午太陰犯

輿鬼丙戌太白晝見安西王傅請立王相府帝曰去歲阿

難荅已嘗面陳朕諭以世祖定制今復奏請豈欲以四川

京兆悉爲彼有邪賦稅軍站皆朝廷所司今姑從汝請置

王相府惟行王傅事丁亥太陰犯平道庚寅犯鉤鈴命圖

赤爲御史大夫乙未回紇不剌罕獻師豹藥物二月己亥

朔自六盤山至黃河立屯田置軍萬人辛丑立中御府丙午禁軍將擅易侍衛軍蒙古軍以家奴代役者罷職仍令其奴別入兵籍畀以本主資產之半軍卒擅更代及逃歸者死丁未太陰犯井括蒙古戶漸丁充行伍三月壬申以不忽木爲昭文館大學士平章軍國事還太原平陽路蒲萄園爲民業罷四川馬湖路所進獨本慈癸酉有言晉王甘麻剌及太師月爾魯有異圖者樞密院鞫之無驗帝命言晉王者死言太師者謫從軍乙酉太陰犯鉤鈴夏五月戊辰朔免兩都徭役甲戌詔民間馬牛百取其一羊不滿百者亦取之惟色目人及數方取丁丑太陰犯平道庚辰吐蕃叛掠階州遣兵討之庚寅禁諸王駙馬招戶令有分地功臣戶與民均納供需詔諸徒役者限一年放歸毋杖

六月乙巳太白犯天關以調兵妨農免廣西今年田租丁巳太白犯填星癸亥太陰犯井秋七月癸酉敕茶鹽轉運司印鈔提舉司運糧漕運司官以三年爲代雲南福建官吏滿任者準給驛歸壬午填星犯井太白犯輿鬼己丑命行臺御史鉤校隨省理問所案牘諸提調錢穀官所部有逋欠者勿遷敘八月丁酉朔禁舶商毋齎金銀過海諸使海外者不得爲商立肇州屯田萬戶府庚子太陰犯亢太白犯軒轅癸卯太陰犯天江乙巳立捕盜賞格凡告捕強盜一名者賞鈔五十貫竊盜半之應捕者又半之皆徵諸罪人無可徵者官給乙卯太陰犯天街太白犯上將隆興路隕霜殺禾九月戊辰太白犯左執法壬申太陰掩南斗甲戌罷民間鹽鐵鑪竈命沿海巡禁私鹽定浙東福建湖

廣兩稅法秋稅止輸糧夏稅則雜以木棉布絹絲絲土物
丁丑太陰犯壘壁陳甲申雲南乞藍部長荅刺率諸蠻來
降以其地爲雲遠路己丑太陰犯軒轅河決杞封上祥符
寧陵襄邑五縣贛州賊劉六十聚眾萬餘建僞號江西左
丞董士選討平之冬十一月丁卯蠻洞荅馬刺一本王遣
其子進象十六丁丑太陰犯月星及天街庚辰犯井丁亥
犯上相增明年海運糧爲六十萬石調芍陂屯田軍萬人
修大都城戊子太陰犯平道壬辰犯天江省雲南柏興府
入德昌路十二月戊戌立徹里軍民總管府本古產里寢
宇記作車里
復置蒙樣剛等甸軍民官癸卯定諸王朝會賜與太祖位
金各千兩銀七萬五千兩世祖位金各五百兩銀二萬五
千兩餘各有差丁未太陰犯井乙卯犯進賢復司天臺觀

星戶增置侍御史二員釋在京繫囚百人

大德元年丁酉春正月辛卯以王慶端爲中書右丞張斯立參知政事建五福太乙神壇時

通政云建南郊

二月丙申蒙陽

甸長遣弟阿不剌來獻方物卽其地立通西軍民府升全州爲全寧府濟寧寧陽鎮爲縣改隸州巡檢司爲河曲縣戊午暹國羅斛羅羅斯各遣使來朝己未改福建省爲福建平海等處行省徙治泉州減福建歲織段三千匹其車渠帶工別立提舉司掌之庚申以改元赦天下詔曰朕荷天地之洪禧承祖宗之不祚仰遵成憲庶格和平比者桀木忽爾兀魯思不花朵爾朵懷等去逆效順率眾內附畢會宗親釋其罪戾適星芒之乖象豈天意之儆予宜推一視之仁誕布更新之政可改元貞三年爲大德元年三月

戊辰熒惑犯井庚午以耶先鐵木爾平章政事梁德珪暗都爲右丞八都馬辛爲左丞癸酉太陰掩軒轅大星甲戌詔并各省鎮守軍福建并爲五十三所江浙并爲二百二十七所江西并爲六十四所丁丑封諸王鐵木爾不花爲鎮西武靖王丁亥禁正月至七月捕獵庚寅五臺山佛寺成皇太后親往祈祝御史李元禮諫止之不聽夏四月癸巳朔日食丙申敕御史臺不立選惟監察御史首領官聽御史臺自擇各道廉訪使必選用蒙古人或色目世臣子孫其次參以色目漢人各省文案行臺差官檢覈近侍傳奉特旨令臺憲擢用者必俟奏明而後任之行臺御史秩滿有効績者或入內臺或聽中書省遷調廉訪使亦如之其不稱職者省臺擇人往代未歷有司者先授以牧民

官經省臺同選者聽御史臺白調中書省或用臺察之人亦令與御史臺同議各官府憲司官毋得輒入體察一應擬除悉依舊制五月丙寅河決汴梁發民夫三萬塞之戊辰追收諸位下爲商者制書驛券定強盜姦傷事主者首從悉誅不則止誅首盜餘各刺配再犯者竝誅癸酉太白犯鬼積尸氣乙亥太陰犯房丁丑禁民閒捕鬻鷹鵠貴州葛蠻及平伐九寨平珠六洞內附各立長官司上思州賊黃勝許遣其子志寶來降帝曰勝許反側不足信如其悔罪自至則當復官其子命賜衣遣之甲午賜湖廣參政崔良知鹽課鈔千錠旌其廉貧乙未太白晝見丙辰詔僧道犯姦盜重情者聽有司專決免亦奚不辭歲貢馬及雨旸秋七月定在外慶賀行禮以守土官爲班首武職雖品大

者不得撓越庚午太陰犯房辛未罷蒙古軍萬戶府入曲
先塔林都元帥府定奉使外邦者假以會同館使副職銜
不給制命丁亥免上都酒課三年河決杞縣蒲口命河北
廉訪使尙文相視八月丁巳祆星出奎諭諸王自今出獵
悉白供億給衛士牧馬外郡者糧毋仰食於民九月辛酉
朔祆星復犯奎丙寅罷括兩淮民田己丑省南丹州安撫
司改立慶遠南丹溪洞軍民安撫司詔邊遠官已優升品
級而託故不赴者奪其官冬十月辛丑減上都商稅歲額
爲三千錠戊午太白經天增吏部尙書一員十一月壬戌
禁權豪僧道及各位下擅據鑛炭山場并私奪民田其獻
田者加罪罷保定紫荊關鐵冶提舉司還其戶八百爲民
戊辰增太廟牲用馬戊子太白經天溫州妖人陳空崖坐

禪設法僞稱羅平國正治元年平陽州官捕禽之十二月
戊戌禁外郡戍卒封樁錢軍官不以時給反出已錢貸之
徵其倍息者福建平章高興言漳浦縣大梁山產水晶乞
割民百戶采之帝曰不勞民可勞民則勿取壬寅朝洞蠻
內附立長官司二甲辰太白經天丙午太陰犯軒轅欽察
都指揮使牀兀爾攻破巴鄰之地還擊海都軍敗走之甲
寅太陰犯心閏月壬戌太陰犯壘壁陳詔軍戶賣田者由
所隸官給文券丙子太白犯建星淮東饑弛湖泊禁仍聽
正月捕獵是歲順德等路旱樂壽交河疫死者六千五百
餘人和州歷陽縣江漲漂沒民居萬八千五百家衡州鄱
縣山崩水溢竝蠲租振糧三萬餘石

二年戊戌春正月壬辰禁諸王駙馬受投獻公私土田乙

已出糧十萬石振北邊新附貧民罷吐蕃碯門安撫司運司改立碯門魚通黎雅長河西寧遠軍民宣撫司以翰林王惲閭復王構趙與巖王之綱楊文郁王德淵集賢王顥宋渤盧摯耶律有尚李泰郝采楊麟皆耆德舊臣清貧守職特賜鈔二千一百餘錠是月特祭太廟用馬一牛一羊鹿野豕天鵝各七餘如舊是爲特祭之始二月辛酉歲星熒惑太白聚於危乙丑立浙西都水營田司專主水利以張九思梁德珪何榮祖竝平章政事楊炎龍爲右丞以歲入不敷罷中外土木之役后妃諸王所需非有旨勿給罷建康金銀洞冶轉運司歲辦金悉責有司辛未太陰犯左執法丙子犯心癸未禁諸王駙馬毋擅祀嶽瀆其從者毋假控鶴佩帶擾民三月丁亥朔加封東鎮沂山爲元德東

安王南鎮會稽山爲昭德順應王西鎮吳山爲成德永靖
王北鎮醫巫閭山爲貞德廣寧王歲與嶽瀆同祀夏五月
辛卯罷海南黎兵萬戶府以黎蠻屯田府事入瓊州安撫
司壬辰命中書省遣官監雲南四川海北海南廣西兩江
廣東福建等處六品以下選戊戌太陰犯心己酉立致用
院六月庚申罷江南門攤稅禁諸王擅發令旨其越例開
讀者并所遣使拘執以聞壬戌太陰犯角置奉宸庫秋七
月癸巳太陰犯心汴梁河決遣尙書那懷御史劉賡塞之
自蒲口首事凡築九十六所八月壬戌太陰犯箕九月辛
丑太陰犯五車南星癸卯太陰犯五諸侯己酉犯左執法
庚戌立吉贛汀三州屯田命廣海左右江成軍依舊制二
年更代冬十月壬戌太白犯牽牛置蒙古都萬戶府於鳳

翔戊寅太陰犯角距星令御史臺稽察樞密院案牘十一月丙申罷雲南行御史臺爲陝西行臺移治京兆置雲南肅政廉訪司己亥太陰犯輿鬼辛丑辰星犯牽牛壬寅太陰犯右執法十二月戊午太白經天括諸路馬除牝孕攜駒者己未填星犯輿鬼乙丑太白犯歲星太陰犯熒惑庚午填星入輿鬼太陰犯上將詔逃軍復業者免役三年給陳亡軍妻子衣糧甲戌彗出子孫星下己卯太陰犯南斗辛巳定諸稅錢三十取一歲額之上勿增是歲甘肅沙州鼠傷稼江浙水大都檀州雨雪山東河南淮揚燕南山北蝗各調租如例振糧十五萬餘石釋在京囚繫二百一十九人

三年己亥春正月癸未朔下存恤軍民詔曰朕自卽位以

來重念屯戍征進軍士久服勞苦管軍官輿魯官務加休息不得妄有科配前詔已嘗及之今樞密院奏江南平定之後軍馬別無調度所司不知撫養致使軍前告退者多起補之閒官吏因而作敝應嚴行禁治如有違犯酌輕重降黜至於張官置吏本以爲民小吏祿食不敷以致掊取爲害令中書省各添給俸米鰥寡孤獨除照常給振外自後每名添中統鈔一兩遇天壽節加支二兩著爲令丙戌太陰犯太白己丑中書省臣以星變各引咎避位帝曰此漢人故事豈可一一倣之邪卿等但擇賢者任之自可挽回天意庚寅遣使問民疾苦除本年內郡包銀俸鈔免江南夏稅十之三增各路惠民藥局癸巳封藥木忽爾爲定遠王命哈刺合孫爲左丞相丁酉太陰犯太微西垣上將

戊戌犯右執法乙巳太白經天二月癸丑朔罷四川福建
行省陝西行臺江東荆南淮西三道宣慰司置四川福建
宣慰司都元帥府及陝西漢中道廉訪司己巳熒惑犯五
諸侯壬申封吳大夫伍員爲忠孝威惠顯聖王三月甲午
命何榮祖定律令帝曰古今異宜不必相沿但取宜於今
者戊戌熒惑犯輿鬼詔軍官受賊重者落職輕者降散官
或決罰就職停俸期年許令自効夏四月己未太陰犯上
將丙寅填星犯輿鬼太陰犯心庚午嚴捕淮浙私鹽驗所
獲遷賞自通州至兩淮設巡防捕盜司十有九所五月壬
午罷江南諸路釋教總統所放諸寺佃戶五十餘萬爲民
丙申太陰犯南斗海南速古臺速龍探奔奚里諸番以虎
象及杪羅木舟來貢己亥太白犯畢禁海商以人馬兵仗

往諸番賈易六月癸丑罷大名路所獻黃河故道田輸租
戊午以福建州縣官內多色目南人命以漢人參用禁福
建民冒稱權豪佃戶規免門役庚申太陰掩房丁卯熒惑
犯右執法壬申歲星晝見秋七月己卯朔太白犯井丁未
太陰犯與鬼淮揚屬縣蝗爲驚啄食飛者以翅擊死詔禁
捕鷺八月己酉朔太史奏日食不應丁巳太陰犯箕戊辰
太白犯軒轅大星己巳太陰犯五車九月壬辰夜有流星
色赤尾長丈餘光燭地起自河鼓沒於牽牛之西有聲如
雷癸巳罷括宋手號軍乙未太陰犯昴距星丁酉太白犯
左執法置河東山西鐵冶提舉司冬十月壬子授皇后冊
寶甲寅復立海北海南道廉訪司丙子太陰犯房十一月
庚辰置浙西平江河渠牐堰凡七十八所乙酉太白犯房

丁酉浚浙西太湖及澱山湖十二月己酉徙鎮巢萬戶成沅靖毗陽萬戶戊辰州均州萬戶成常德癸酉諭中書省貨財出納自今無券記者勿與以阿魯渾薩理平章政事是歲命皇兄子海山即武宗代寧遠王闊闕出鎮漠北賜馬二萬二千九百匹

四年庚子春正月丙申嚴京師惡徒之禁犯者黥刺拘役癸卯復淮東漕渠二月丁未朔日食丙辰皇太后崩明日祔葬先陵戊午太陰犯軒轅乙亥立烏撒烏蒙等郡置維摩州夏五月癸未諭平章阿魯渾薩理曰集賢翰林乃養老之地自今諸老滿秩者升之勿令輒去甲午太陰犯壘壁陳辛丑太白犯輿鬼太陰犯昴復置延慶司六月丙辰加月赤察爾太師完澤太傅丁巳太白犯填星甲子敕各

省非奉命毋擅役軍弔吉爾瓜哇蘸八等國來朝秋七月
甲戌朔上皇太后尊諡曰裕聖皇后升祔裕宗廟辛卯熒
惑犯井封乳母韓氏爲燕冀國順育夫人石抹氏爲冀國
夫人八月癸卯朔更定蔭敘格正一品子爲正五從五品
子爲從九中閒正從以是爲差蒙古色目人特優一秩癸
丑太陰犯井甲子辰星犯靈臺上星閏月庚辰熒惑犯輿
鬼以賀仁傑平章政事九月戊午太白犯斗壬戌太陰犯
輿鬼升英德州爲路置廣東鹽課提舉司甲子太白犯斗
改中御府爲中政院掌中宮財賦營造事冬十一月壬寅
朔免上都大都隆興明年絲銀附近牧地免稅糧十之三
徒罪各減一半杖以下釋之并遼陽省所轄狗站牛站爲

一

輟耕錄云高麗以北名別失八里譯言連五城也罪人
之流奴兒于者必經此其地極寒海亦冰自八月卽合

至明年四五五月方解人行其上如平地征東行省每歲委官至奴兒干給散囚糧須用站軍每車以四狗挽之狗悉諸人性站有狗分例若剋減之必齧其主者至死乃已十二月癸酉定江北墾荒者四年起科初制三年起科恐貧民力不逮故展限一年庚寅熒惑犯軒轅癸巳太陰犯房是歲建康平江湖北浙東饑寧國太平旱振粟三十四萬九千三百石

五年辛丑春正月己酉太陰犯五車壬子犯輿鬼積尸氣奉安皇妣裕聖皇后御容於護國仁王寺敕官吏犯賊及盜官錢事覺雖遇赦免亦加降黜小吏犯賊者竝罷不敘辛酉太陰犯心罷檀景兩州采金鐵冶及福建織繡提舉司二月己卯太陰犯輿鬼丁亥詔廉訪司官非親喪遷葬及以病在告者不得離職軍民官或以地遠職卑已除不赴任者奪職勿敘己亥永寧路總管雄挫曲靖路宣慰使

忽林失來朝三月戊申太陰犯御女戊午馬來忽等海島
遣使來貢丁卯熒惑犯填星己巳熒惑填星相合夏四月
壬申太陰犯東井癸巳禁和林釀酒其諸王駙馬許自釀
飲民間無釀具而儲酒者勿問五月癸丑太陰犯南斗乙
卯熒惑犯右執法商州隕霜殺麥丙辰河南妖賊醜斯等
伏誅雲南土官宋隆濟反攻貴州知州張懷德死之丁卯
太白犯井六月甲申歲星犯司怪癸巳太白犯輿鬼歲星
犯井秋七月戊戌朔晝晦暴風起東北大雨雹丙午歲星
犯井丁未命監察御史審覆宗正府罪囚檢刷宣政院案
牘辛亥太陰犯壘壁陳癸丑浙西積雨傷民田命役夫二
千人疏導河道庚申辰星犯太白叛王合丹之孫脫歡自
北來歸以暗伯阿忽台竝知樞密院事八月諭行中書省

宣慰廉訪二司列置諸路之上本以弭盜賊修政事糾不法撫良民也近年於此略而不問自今各修乃職凡在所屬常加檢察期於政成民安諸路鎮靜而止有不稱任者省臺錄其實跡奏示黜罰其嶽鎮海濱名山大川風師雨師雷神各正官齋戒致祀有不敬者聽廉訪使糾彈庚辰遣官分道慮囚累年不決者具疑狀申省臺詳讞有星孛於東井歷紫微天市垣至九月乙丑凡四十六日而滅壬辰太陰犯軒轅御女乙未填星犯太微西垣上將冬十月丙寅朔畿內饑增明年海運糧爲百二十萬石戊寅武定路土官羣則獻方物癸未太陰犯東井改鄂州爲武昌路丁亥定軍官旣受命而不時赴及差竣不卽還者準民官例違限六月選人代之被代者期年始敘辛卯夜有流星

大如杯光燭地自北起近東分爲二星沒於危宿十一月
己亥歲星犯東井降容象橫賓路爲州升昭州爲平樂府
省泌縣入唐州丁未設肆三十六所減直糶米振京師貧
民戊申太陰犯昴獠人藍賴率丹陽三十六洞來降立長
信寺領大幹爾朶怯憐口諸事湛然居士集云每新君立
另設一帳房極金碧之盛
名幹爾朶後君立復自作之
怯憐口謂習百工技藝者十二月甲戌歲星犯司怪辛
卯太陰犯南斗定凡盜人孳畜者取一償九然後杖之是
歲海都與篤哇大舉入寇皇兄子海山躬督五軍破之射
篤哇中膝號哭遁去海都走死江湖湓東起通泰崇明西
盡眞州民被災死者不可勝計振米八萬七千餘石
六年壬寅春正月癸卯詔千百戶等自軍中先事而逃者
罪死敗而後逃者杖罷之沒入其子女乙巳晉王甘麻刺

薨庚戌江南僧石祖進告朱清張瑄不法十事下御史臺
按問帝曰朕聞江南富戶侵占民田以致貧者流離轉徙
卿等嘗聞之邪臺臣言富民多乞護持璽書依倚以欺貧
民官府不能詰治宜悉追收爲使帝命速行毋越三日并
諭自今僧官僧人犯罪御史臺與內外宣政院同鞫凡寺
觀續置田土及民以施入爲名者竝輸租充役乙卯築渾
河堤長八十里禁豪家毋侵舊河定軍官除邊遠征戍外
凡遇祖父母父母喪俱準終制蒙古色目人各從本俗有
願守制者聽壬戌填星犯太微西垣上將二月庚午太陰
犯昴西南夷叛遣耶速帶爾劉國傑次第討平之癸巳帝
有疾釋京師重囚發通州倉粟振貧民三月丁酉以旱沴
爲災詔赦天下大都平灤被災尤甚免差稅三年其餘災

傷之地已經振恤者免一年今年內郡包銀俸鈔江淮以
南夏稅及諸路散辦門攤課程盡賜調免壬寅太陰犯與
鬼癸卯歲星犯井甲寅太陰犯鉤鈐合祭昊天上帝皇地
祇五方帝於南郊遣左丞相哈刺合孫攝事此攝祀天地
之始夏四月乙丑朔太白犯東井丁卯曲赦雲南諸部蠻
夷戊寅太陰犯心戊子修盧溝上流石徑山河堤庚寅太
白犯輿鬼五月乙巳給貧乏漢軍地及五丁者一頃四丁
者二頃三丁者三頃其孤寡者存恤六年逃散者招諭復
業戊申太廟寢殿災六月癸亥朔日食太史院失推筴下
中書議罪填星犯太微西垣上將甲子建文宣王廟於京
師時京師未有孔廟國學寓於他所左丞相哈刺合孫奏始建之乙亥太陰犯斗秋七月
癸巳朔熒惑填星辰星聚于井庚子太陰犯心戊午犯熒

惑辛酉以忽都不丁爲中書右丞八月乙丑熒惑犯歲星
己巳犯輿鬼辛巳太陰犯昴壬午太白犯軒轅九月丙午
熒惑犯軒轅隆興民謠言括童男女至有殺其子者命誅
爲首三人癸丑太陰犯輿鬼丁巳太白犯右執法冬十月
甲子徙浙東宣慰司治慶元鎮遏海道置大同路黃花嶺
屯田罷軍儲所立屯儲軍民萬戶府壬午熒惑犯太微西
垣上將十一月辛卯填星犯左執法乙未辰星犯房癸卯
太陰犯昴己酉犯軒轅辛亥命合荅知樞密院事十二月
庚申朔熒惑犯填星辛酉雲南地震戊辰又震禁使臣枉
道馳驛己巳歲星犯輿鬼乙亥太陰犯輿鬼庚辰熒惑犯
太微東垣上相癸未太陰犯房是歲振浙江饒州糧二十
九萬一千石給京師貧民鈔十一萬七千錠有奇初太宗

正所定刑獄俱任蒙古必閣赤掌橐其中枉誤甚多至是始令譯史立漢文卷委蒙古漢御史各一員閱視密覆然後待報革諸衙門濫設貼書

七年癸卯春正月戊戌太陰犯昴甲辰犯軒轅己酉弛饑荒所在山澤河泊禁乙卯誅朱清張瑄盡拘其海船軍器丁巳令樞密院選軍士習農業者教軍前屯種二月辛未以木八刺沙阿老瓦丁竝中書平章政事尙文爲左丞朵台董士珍參知政事壬申詔樞密院宗正府自今政事與中書共議然後奏聞遷調官員諸司不得擅奏雖經特旨用者於例未允亦聽覆奏戊寅太陰犯心帝語省臣曰比有以歲課增羨希求簡賞者此非培克於民何從而出自今除元額外勿以羨增作正數罷江南都水庸田司詔和

林軍六年更戌仍給鈔以周其乏三月己丑朔定凡子孫或因貧困或信師巫說誘擅發祖父墳墓移棄尸骸貨賣塋地者與惡逆同罪庚寅遣使宣撫循行天下以郝天挺等十三人充七道使並給銀印江浙平章託託遣發朱清張瑄家屬出金珠重賂之託託以聞帝曰朕以江南任卿果能爾真男子事也其益恪勤乃事賜黃金五十兩壬辰以大都比歲不登罷修建僧寺工役乙未中書平章巴顏梁德珪段貞阿魯渾薩里右丞八都馬辛左丞月古不花參政迷而火者張斯立等皆以受朱清張瑄賂罷甲辰增給京朝官祿米外任官無職田者亦驗俸量給戊申大統志成夏四月癸亥太陰犯東井徵陳天祥張孔孫爲集賢大學士郭筠昭文館大學士皆同議中書省事丙寅太

陰犯軒轅乙亥歲星犯輿鬼太陰犯南斗劉國傑敗宋隆
濟於墨特川禽斬之甲申熒惑犯太微垣右執法丁亥歲
星犯輿鬼五月己丑開上都大都酒禁壬辰辰星犯東井
濬上都灤河甲寅禁諸王駙馬毋輒杖州縣官吏縱獵擾
民山東隕霜殺麥閏月戊午朔日食壬戌禁犯曲阜林廟
戊辰太陰犯心丞相完澤卒六月己丑發蒙古軍萬人分
鎮瓜沙二州隘口仍立屯田以供軍癸卯詔凡軍官子弟
年及二十者與民官子孫同倖直一年方許襲職萬戶於
樞密院千戶於行省百戶於本萬戶乙巳罷四川宣慰司
復立行省修甘肅阿合潭曲尤濠俾通漕運秋七月壬戌
禁僧人以修建寺宇爲名齎諸王令旨乘傳擾驛丙寅命
哈刺合孫爲右丞相阿忽台爲左丞相戊寅歲星犯軒轅

己卯太陰犯井詔朝臣三品以下年七十者各升散官一等致仕乙酉熒惑犯房八月辛卯夜地震平陽太原尤甚邨堡移徙地裂成渠人民壓死者眾摧圮宮觀千四百餘區遣使分道振濟癸巳太白犯氐甲午熒惑犯東咸太陰犯牽牛乙巳歲星犯軒轅辛亥熒惑犯天江九月丙寅太白晝見以太原平陽地震禁諸王所部擾民仍減歲飼馬之半辛未熒惑犯南斗罷僧官有妻者甲戌太陰犯東井乙亥太白犯南斗都城火命樞密院增巡防兵壬午辰星犯氐冬十月丁亥太白經天戊子以江浙年穀不登減海運四十萬石癸巳以行省官久任多與所隸編氓聯姻害政詔互遷之命只爾合忽知樞密院事給大都文宣王廟洒掃戶五乙未發雲南叛寇餘黨來京師庚子改平瀾爲

永平路升晉定府爲路以故知府容苴妻適姑爲總管

云容苴効順賊未平而沒其妻能宣力戎行故有是命

辛丑太陰犯東井庚戌翰林

國史院進太祖太宗定宗睿宗憲宗五朝實錄辛亥增蒙古國子生百員十一月甲寅朔改順元路隸湖廣升全寧府爲路己未太白經天辛酉雨木冰丙寅填星犯進賢戊辰太陰犯井己卯犯東咸十二月甲申朔加封眞武爲元聖仁威玄天上帝乙酉許貧民釀酒丙戌太白經天熒惑犯壘壁陳詔蒙古軍居山東河南者免遠戍甘肅丙申太陰犯東井辛丑犯明堂丁未犯天江庚戌彗星見約盈尺在室十一度入紫微垣奉使宣撫奏罷七道賊污官吏一萬八千四百七十三人審冤獄五千一百七十六事賊罰鈔四萬五千八百六十五錠

八年甲辰春正月己未以災異故詔天下曰去歲地震平陽太原爲甚一切差發稅糧自大德八年爲始與免三年隆興延安上都大同懷孟衛輝彰德真定河南安西等路被災人戶與免二年大都保定河閒等路免一年江南佃戶承種田土者私租大重以致小民困窮今普減十分之二著爲例至國家財物自有常制比者諸人妄獻田土戶計山場窑冶增添課程無非徼名貪利生事害民嗣後悉皆禁治其軍站民匠各戶往往託名僧道影蔽差徭自今有願出家者必本戶丁多差役不闕及有昆仲侍養父母許赴原籍官司陳告勘實方準薙度違者斷罪歸俗乙丑復置遂平新蔡真陽大和沈丘潁上柘城城父郟舞陽十縣丙寅以塔思不花爲中書右丞趙仁榮參知政事辛巳

禁諸王駙馬往遼東捕海東鵲者毋給驛癸未增築河防
自滎澤至睢州凡十有八所是月平陽地再震已修民居
復壞二月丙戌增廣國子生二百員選宿衛大臣子孫充
之降莊浪路爲州省隴干縣入德順州甲午詔父子兄弟
有才者許並居風憲丙申分軍屯田於薛出合出谷甲辰
國史院進世祖實錄金書節文一冊三月乙丑彗星始滅
凡見七十四日戊辰詔諸王駙馬分地所置達魯花赤惟
用蒙古人三年依例遷代軍官擅離所部者悉遣還翼軍
人不告所部私歸者杖之軍民逃奴有獲者卽付其主誘
匿者論罪仍追逃奴鈔充獲者賞夏四月丙戌詔諸路畏
吾兒合迷里自相訟者歸都護府與民交訟者聽有司專
決丁未分教國子生於上都五月癸未

應作丑

朔日食辛酉

濬吳江松江海口役租戶萬五千人免其租人十五石設
行都水監董其程復良田百餘里汝寧妖人李曹廬妄言
得天書惑眾伏誅秋九月庚申復巴顏梁德珪八都馬辛
迷而火者等官御史杜肯構中丞何瑋上章諫不報以阿
里爲中書平章政事張祐脫歡竝參知政事癸酉諸王察
巴爾篤哇遣使來附賜幣六百匹潮州颶風起海溢民溺
死者眾改封皇兄子海山爲懷寧王冬十一月壬子詔內
郡江南人凡爲盜黥三次者謫戍遼陽諸色及高麗人三
次免黥謫戍湖廣盜禁鑾馬者初犯謫戍再犯者死丁卯
復免天下僧道租戊辰以鐵古迭爾鐵一作帖爲御史大夫壬
申增海漕爲百七十萬石十二月庚子復立益都淘金總
管府辛丑封諸王出伯爲威武西寧王

九年乙巳春正月丁巳太陰犯天關甲子犯明堂己巳犯東咸定攷試教官法初充學錄教諭試詞賦二韻小賦竝二韻經義論孟義明經解題各一道學正升教授試詞賦全賦一道經義各從所業大義一道明經解題二道二月丁酉封諸王完澤爲衛安王藥木忽爾爲威定王庚子議行郊祀禮辛丑令御史臺翰林集賢院六部於五品以上各舉廉能識治體者三人行省行臺宣慰廉訪司各舉五人免大都上都隆興差稅內郡包銀俸鈔一年建大天壽萬寧寺詔致仕官止一子應承蔭者竝免保直家貧者給半俸終身三月丁未朔諭仲春已後農民力作其敕有司慎毋生事煩擾或有小罪卽與疏決勿禁繫以妨農時甲寅熒惑犯氐戊午歲星犯左執法以高興平章政事仍

樞密副使夏四月庚辰太陰犯井乙酉大同路地震壞官民廬舍五千餘間壓死二千餘人懷仁縣地裂二所涌水盡黑漂出松柏朽木遣使振之己丑東川路蠻官阿葵來獻方物壬辰太白犯井五月丁未大都旱遣使持香禱雨戊申徵原任陝西儒學提舉蕭剌赴闕命有司給以安車戊午立衍慶司癸亥歲星掩左執法以地震改平陽爲晉寧太原爲冀寧竝蠲今年商稅省鬱林縣入貴州六月丙子朔立皇子德壽爲皇太子詔赦天下賜高年帛親年七十別無以次侍丁者許就近遷除外任官五品以下竝減一資致仕官褒加一秩諸罪囚淹繫疑不能決者釋之流竄遠方之人量移內地甲午潼川江溫漂民居溺死者眾秋七月乙巳朔升太府監爲太府院丙午熒惑犯氏辛亥

築郊壇於麗正文明門之南丙位設郊祀署令丞太祝奉
禮協律等官癸丑以黑水新城爲靖安路甲寅太白經天
壬戌命故皇兄晉王妃弘吉刺氏及兄子愛育黎拔力八
達即仁宗出居懷州封爲懷王丁卯熒惑犯房復以段貞八
都馬辛竝平章政事合刺蠻子爲右丞迷而火者爲左丞
耶先伯參知政事沔陽玉沙江陳州西華河皆溢八月辛
巳太陰犯東咸汰李可孫亢員掌治蜀栗者增曲阜陵廟洒埽
戶以尙珍署田五十頃供歲祀乙未熒惑犯天江九月丁
巳熒惑犯斗冬十月丙戌太白經天復芍陂洪澤屯田及
兩淮官地爲豪右占據者悉令輸租己丑命兩廣以南軍
與土人同戍是月帝不豫中宮秉政十一月丁未發鈔萬
錠於雲南令與貝通攷作賦參用其貝非出本土者同僞鈔論

通攷云按雲南賦以一爲莊四莊爲手四手爲苗四苗爲榮庚戌歲星太白填星聚於

亢癸丑歲星犯亢丙寅歲星晝見庚午祀昊天上帝於南

郊以哈刺合孫阿忽台鐵古迭爾爲三獻官省祖宗配位

壬申太白經天十二月丙子太白犯西咸地震庚寅熒惑

犯壘壁陳皇太子德壽薨己亥辰星犯建星是歲河間益

都般陽諸屬隕霜殺桑二百四十餘萬本

十年丙午春正月壬寅朔高麗王王珣遣使來朝自世祖末年高麗朝正使不時至

至是適一會焉甲辰訪莊聖順聖裕聖三皇后儀範以

備紀錄庚戌濬真揚等州漕河令鹽商每引輸鈔二貫爲

儲工費丁巳太白犯建星戊午罷江南白雲宗都僧錄司

汰其民歸州縣僧歸各寺田悉輸租時有白雲宗總攝所統江南爲僧之有髮

壬戌發河南民十萬築河防禁近侍毋輒驛召外郡官

丁卯營國子學於文宣王廟西閏月癸酉太白犯牽牛己丑犯壘壁陳甲午以鐵哥閣里阿散竝平章政事張閭杜思敬月古不花竝爲中書左丞劉源參知政事二月丙辰封孛羅爲鎮寧王戊午太陰犯氐三月戊寅歲星犯亢崆古王遣使來貢夏四月庚子朔詔凡匿鷹犬者沒家資之半來獻者給以賞辛酉填星犯亢壬戌曲靖羅雄州渠長阿邦龍少結諸蠻爲寇平章耶速帶爾捕斬之甲子倭商有慶等抵慶元賈易以金鎧甲爲獻五月詔江南平定之後悉爲吾民比聞營利之徒以人爲市因而強略良人及借乞養過房名色公然販鬻奸僞非一朕甚憫之自後南北往來販人客旅竝行禁止經過關津盤詰得實強略者以強盜例科斷和誘者次之至軍中所得子女出征軍官

元史卷七

本紀

三

同管民官從實分揀如係良民速令完聚果係賊屬聽本營萬戶千戶出具印照如敢擅略平民律同強盜其有欲將驅口轉行貨賣者須赴所在官司給到公據違者俱各斷罪癸未定西番僧往還者給以舟車毋令馳驛乙酉以塔魯忽台塔刺海並知樞密院事六月癸未太陰犯羅堰上星己未歲星犯亢壬戌復立淮西道廉訪司秋七月庚辰太陰犯牽牛辛巳釋諸路罪囚常赦所不原者不與八月壬寅歲星犯氐熒惑犯太微西垣上將開成路地大震壞王宮及官民廬舍壓死故秦王妃耶里完等五千餘人丁巳文宣王廟成行釋奠禮用太牢登歌樂製法服三襲命翰林院定樂名樂章九月己巳熒惑犯太微垣右執法壬午犯左執法冬十月甲辰太白犯斗青山叛蠻紅犵獠

等來附辛亥太陰犯畢甲寅犯井十一月辛未歲星犯房
壬申太陰犯虛甲戌熒惑犯亢戊子犯氏辛卯太陰犯熒
惑十二月壬寅太白晝見乙巳歲星犯東咸帝有疾禁天
下屠宰四十二日丙辰遣宣政院使沙的禱於太廟戊午
太陰犯氏是歲晉寧冀寧地震不止大同暴風雨沙道州
江湓山裂平江海嘯壤民居出鈔萬三千六百錠糧八萬
七千餘石振之

十一年丁未春正月丙辰

應作寅

朔帝大漸免朝賀癸酉崩

於玉德殿年四十二乙亥葬起輦谷是年九月乙丑加上
尊諡曰欽明廣孝皇帝廟號成宗蒙古語曰完澤篤皇帝

元史卷七終

元史卷八

本紀六

武宗

武宗皇帝諱海山世祖皇太子眞金第二子荅刺麻八剌之長子成宗兄子也母弘吉刺氏荅刺麻八剌子二長卽帝次愛育黎拔力八達卽仁宗帝以至元十八年七月十九日生成宗大德三年以寧遠王闊闊出總兵北邊怠於備禦命帝卽軍中代之四年八月與叛王海都戰敗之於闊別列之地五年八月又與戰於迭怯里古及合刺合塔之野師失利帝親出督戰大破之援諸王駙馬眾軍以出明日復戰陳少卻海都乘之帝揮軍力戰突出敵陳後海都不得志旋走死八年四月封帝懷寧王賜金印置王傅官割瑞州六萬五千戶爲食邑歲給五戶絲直鈔二千六

百錠幣帛各千匹十年七月自脫忽思圖之地踰按台山追叛王幹羅思獲其妻孥輜重執叛王耶孫圖阿及駙馬伯顏等八月軍於耶里的失之地受諸王圖滿明里阿魯灰等降海都子察巴爾逃於篤哇部盡俘獲其家屬營帳冬駐按台山降王圖曲滅復叛與戰敗之北邊悉平成宗晚年立子德壽爲皇太子皇后伯岳吾氏忌帝兄弟乃出帝母弟愛育黎拔力八達與帝母元妃弘吉刺氏居懷州無何德壽卒成宗寢疾無子后恐帝立修前怨召安西王阿難荅及諸王明里入朝陰屬意安西十一年正月成宗崩丞相阿忽台平章巴顏八都馬辛與明里謀奉后垂簾聽政援立安西王潛遣師斷帝歸路毋令入時帝居北邊適遣康里托托入京計事丞相哈剌合孫急令還報且恐

帝遠內難將作先遣使迎愛育黎拔力八達於懷州暫監國至則定計誅阿忽台八都馬辛巴顏等并執阿難荅明里二王歸上都遣使迎帝三月帝自按台山至和林諸王勦賊畢會皆曰今阿難荅等煽惑中宮陰蓄異志恐變生不測乃合辭勸進帝謝曰吾母吾弟在大都俟宗親畢會再議會帝母元妃惑於日者言欲帝讓位於其弟帝聞之謂康里托托曰我捍禦邊陲勤勞者十年且倫序居長術數之言茫然難信設我所爲上合天心下副民望則雖一日之短亦足垂名萬年何可以陰陽家言而遽乖祖宗之法哉此殆用事之臣擅權專殺懼罪故爲是奸謀動搖大本耳汝疾往察事機歸報我於是親帥大軍由西道諸王按灰由中道牀兀爾由東道各以勁旅萬人從托托馳至

大都入道帝言帝母愕然曰修短之說出自術家今宗王大臣議已定太子不速來何爲復遣托托往促帝行至旺兀察都之地帝輿中望見之趣使同載托托具白母妃言且道安西謀變太弟監國始末帝大感悟五月乙丑至上都愛育黎拔力八達侍母元妃來會左右部諸王畢至乃廢成后出居東安州尋與阿難荅及明里竝賜死甲申帝卽位於上都詔曰昔我太祖以武功定天下世祖以文德治海內列聖相承丕衍無疆之祚朕自先朝肅將天威撫軍朔方殆將十載親御甲冑力戰卻敵者屢矣方諸藩內附邊事以寧遽聞宮車晏駕迺有宗室諸王貴戚元勳相與定策於和林咸以朕爲世祖曾孫之嫡裕宗正派之傳以功以賢宜膺大寶朕謙讓未遑至於再三聞者姦臣乘

隙謀爲不軌賴祖宗之靈母弟愛育黎拔力八達稟命太
后恭行天罰內難旣平神器不可久虛宗祧不可乏祀合
辭勸進誠意益堅朕勉徇輿情於五月日卽皇帝位任大
守重若涉淵冰屬嗣服之云初其與民以更始可大赦天
下免上都大都隆興差稅三年江南諸路民糧十分免三
雲南八番諸甸差發全免各軍站工匠鹽場鐵冶等戶合
納稅糧概免三分被災山場湖泊課程權且停罷鐵冶許
諸人煽辦謁積逋恤鰥寡免儒戶差役命中書省續議舉
貢法追尊皇考曰皇帝尊母元妃爲皇太后壬辰加知樞
密院事朵爾朵海太傅右丞相哈刺合孫太保竝錄軍國
重事命塔刺海爲左丞相阿沙不花明里不花竝平章政
事劉正爲左丞遙授欽察及耶先鐵木爾竝參知政事以

塔思不花爲御史大夫牀兀爾知樞密院事特授乞台普濟平章政事抄爾赤塔海竝右丞阿里左丞康里托托御史大夫六月癸巳朔詔立母弟愛育黎拔力八達爲皇太子授以玉冊金寶甲午建行宮於旺兀察都立宮闕爲中都丁酉詔諸王朝會賜與悉如大德所增之數己亥以都指揮使馬謀沙角觶屢勝遙授平章政事癸卯復置詹事院及皇太子家令府正延慶三司典寶典膳二署甲辰以憖刺合爾鐵木爾不花竝知樞密院事丙午太陰犯南斗杓星戊申特授孛蘭奚牀兀爾竝平章政事怯里木丁爲中書右丞丙辰敕銓調軍官聽樞密院公議餘人不得冒請軍官父子兄弟許其相襲革外任官所帶相銜己未改封寧遠王闊闊出爲寧王秋七月癸亥朔封諸王圖刺爲

越王甲子遣大臣以卽位告謝南郊及太廟社稷丙寅以
阿保功授明里大司徒封其妻梅伯順國夫人遣使詣西
域取佛鉢舍利令天下僧誦藏經爲三宮祈福己巳太陰
犯亢置宮師府設太子師傅保賓客諭德贊善庶子洗馬
率更令丞司經令丞中允文學校書正字等官癸酉罷和
林宣慰司仍置行省左遷哈刺合孫爲和林左丞相命月
赤察爾爲和林右丞相進爵淇陽王丁丑封諸王八不沙
爲齊王多列納爲濟王迭里哥爾不花爲北寧王加平章
政事脫虎脫大尉命塔刺海爲右丞相塔思不花爲左丞
相教化法忽魯丁別不花竝平章中書省事庚辰以只爾
合郎爲御史大夫辛巳加封孔子尊號制曰先孔子而聖
者非孔子無以明後孔子而聖者非孔子無以法所謂儀

範百王師表萬世者也朕纂承丕緒敬仰休風循往古之良規舉追封之盛典加號大成至聖文宣王遣使闕里祀以太牢於戲父子之親君臣之義永惟聖教之尊天地之大日月之明奚罄名言之妙敕中書省庶政非公議者勿奏壬午熒惑犯南斗給和林省鈔二千錠歲收息以充公用仍以網罟賜貧民以郝天挺孛羅荅失竝爲中書左丞敕樞密院御史臺宣政院許得自選官他司悉從中書銓注近臣不得輒奏富家願出粟振貸者授以官庚寅置延福司八月甲午停內降旨授官乙未以烏伯都剌參知政事甲辰出納蘭不剌所儲糧萬石振旁近民己酉增置詹事院參議斷事官辛亥中書右丞孛羅鐵木爾以蒙古字譯孝經進帝曰此孔子之微言自王公達庶民皆當由是

而行其命中書省刻板摹印諸王以下皆賜翼寧路地震

九月甲子帝至大都

名臣奏議云武宗初卽位上都卽巡

曰先帝新棄天下陛下巡狩不以時無以慰臣民之望宜早還京師且臣聞人君猶北辰然居其所而眾星共之不在勤遠略也帝

悟卽日還大都

壬申上皇考尊諡曰昭聖衍孝皇帝廟號

順宗上大行皇帝尊諡曰欽文廣孝皇帝廟號成宗又上

成宗后弘吉烈氏尊諡祔成宗室定祔廟之次哈刺合孫

言順宗爲成宗同母兄其神主宜兄先弟後帝從其議癸

酉太白犯右執法甲戌改太常寺爲太常禮儀院尙乘寺

爲衛尉院置皇子位典牧監典幄署典樂司丙子奪諸王

公主駙馬及諸人賜田還官并停一切賜予丁丑定省臣

官數依舊制爲十二員右丞相塔刺海左丞相塔思不花

平章牀兀爾乞台普濟如故以阿沙不花塔失海牙平章

政事孛羅荅失劉正爲右丞郝天挺耶先鐵木爾爲左丞于章烏伯都剌參知政事其班朝諸司冗員竝從察汰乙卯太白犯左執法甲申議立尙書省分理財用命脫虎脫教化法忽魯丁任省事俾自舉官屬臺臣言至元中阿合馬桑葛相繼立尙書省事敗并入中書頃爲綜理財用又復立之勢必增置有司濫設官吏無益帝曰卿言良是但此三臣者願任其事姑聽其行冬十月乙未升典寶署爲監典瑞利用二監爲院乙巳太白犯亢甲寅太陰犯明堂丙辰以買閭知樞密院事敕行省平章總督軍馬得佩虎符其左丞等所佩者悉追納十一月癸亥封諸王身忽都爲楚王丙寅帝朝皇太后於隆福宮上玉冊玉寶丁卯太白犯房乙亥禁軍站鷹房控鶴等戶毋冒占民田苟免徭

役丙子太陰犯東斗乙酉犯亢庚寅賜太師月赤察爾江

南田西賜田悉奪還官惟以月赤察爾詔皇太后軍民人

匠等戶賦役並隸徽政院辛卯辰星犯歲星十二月壬辰

朔敕金虎符及金銀符非由中書省勿給舊制金銀虎符

皆省給之事畢則仍歸典瑞院後出入多不由中書下至

使人結託近侍奏請濫給以致有出無歸自後除官及奉

必由中書命畱守司以來歲正月十五日起鐙山於大明

殿後延春閣前丁巳以歲歉命宣政院省佛事罷工役庚

申以改元赦天下詔曰仰惟祖宗應天撫運肇啟疆宇華

夏一統罔不率從逮朕嗣服丕圖續膺景命遵承彝訓恪

守洪規永思勑業之艱未知攸濟重念萬幾之統在予一

人故自卽位以來溥從寬厚量能授官俾勤乃職夙夜以

永康兆民爲急務閒者歲比不登流民未復官吏並緣侵

元史卷八

本紀

六

漁上下有乖和氣是以責任股肱耳目大臣思所以盡瘁
贊勸嘉猷朝夕入告朕命惟允庶事克諧樂與率土之民
共享治安之效邇寧遠肅顧不遑與可改大德十二年爲
至大元年誕布維新之令式孚永固之休是歲江浙饑禁
荆襄淮右無遏糶以民艱漕粟令湖廣江西各輸五十萬
石竝由海道達京師杭州一郡歲釀酒糜米麥二十八萬
石至是有禁

至大元年戊申春正月辛酉朔曲赦御史臺見繫犯贓官
吏止徵賊罷職癸亥發六衛軍萬八千五百人供旺忽察
都建宮工役甲子授阿沙不花右丞相行御史大夫事丙
寅罷行都水監辛未帝欲以中衛親軍隸皇太子辭曰世
祖立五衛以應五方去一不可乃摘各翼漢軍萬人別立

一衛爲東宮衛兵立衛率府甲戌禁進海東青鴟者託言
驛騎不敷擅括民馬戊子改徽政院人匠總管府爲膳珍
司升中尙監爲院尙舍監爲寺己丑幽王出伯進王六百
餘斤賜金銀鈔厚荅之罷河西采玉夫遣使巡行諸道其
議弭盜方略或匿盜不聞或期會不至或踰期不獲者官
吏連坐二月癸巳改應房爲仁虞院以右丞相托托等爲
院使丙申立尙服院設尙冠尙衣尙鞞尙沐尙輦尙飾六
奉御隸之更立甄用監隸徽政院驥用資武二庫隸府正
司壬寅改詹事院使爲詹事副詹事爲少詹事院判爲詹
事丞三月乙丑太陰犯井以和林北來貧民八十六萬八
千戶仰給於官非久計分振鈔二百萬錠罷其廩給就令
屯田丁卯爲皇太后建興聖宮復立白雲宗攝所戊寅以

脫脫木爾平章政事己卯命翰林國史院纂修順宗成宗實錄封阿沙不花康國公三寶努渤國公教化魏國公曲出應國公加帖古迭爾耶爾吉尼竝右丞相遣米楫等使蘇魯國夏五月丙寅降英德路爲州丙子禁白蓮社毀其祠還其人隸民籍甲申立大同廣武康里三侍衛親軍都指揮司六月己丑加三寶努錄軍國重事曲出太子太保托托太尉大慈都平章軍國重事丁酉隴西寧遠縣地震烏撒烏蒙三日之中地大震者六封藥木忽爾爲定王乃蠻帶爲壽王加宦者李邦寧大司徒遙授左丞相仍領太醫院事秋七月庚申有流星起自句陳南行圓若車輪微有銳經貫索而滅敕以金銀歲入數少自今毋問何人以金銀奏請及託人轉奏者皆抵罪壬戌禁鷹房於大同隆

興諸地縱獵擾民築呼鷹臺於鄴州澤中

鴻雪錄云南海子本元之飛放

泊元制大都八百里以內東至灤州南至河間西至中山北至宣德府捕兔有禁以天鵝鵝鴝仙鶴鴝鴝私賣者卽以其家婦子給捕獲之人有於禁地圍獵爲奴婢出首者斷奴婢爲良民收住鷹鵝向就近官司送納喂以新羊肉無則易以鷄自正月一日至七月二十日禁不打捕著爲令

旺忽察都行宮成立中都

畱守虎賁二司辛未立御香局建香殿壬申太白犯左執

法癸未樞密院言世祖時設院官六員成宗時增至十三

員今署事多至三十二員非制敕罷塔思帶等十一人乙

酉以參虎人徹爾怯思爲監察御史八月以命相詔天下

曰中書政本也軍國之務小大由之朕自卽位以來厲精

求治爰立輔相以總中書期年於茲大效未著豈選用之

未當與何萬幾之猶繁而羣生之寡遂也今特命左丞相

塔思不花爲中書右丞相太保乞台普濟爲中書左丞相

統百官平庶政便者舉行敝者革去一新條理大小機務並聽中書省區處諸王貴戚不得阻撓近侍官屬及內外諸司事不由中書議者毋隔越聞奏外任官非奉朝命毋擅離職赴都營求私事各省水旱饑荒已嘗遣使分振其至大元年差發夏稅並行蠲免大江以北百姓供億繁勞包銀俸鈔輸納實爲偏重自大德十一年爲始悉予除豁諸站赤消乏逃亡者應速簽補管站頭目有司自典買站戶親屬男女者勒令完聚價不追償戊申立中都萬億庫置寧夏河渠司九月丙辰中書省言夏秋之閒鞏昌地震歸德暴風泰安濟寧眞定大水江浙饑疫癘大作臣等不才願退位以避賢路帝曰舊害事有由來非爾所致爾等但當慎其所行壬戌泉州大賈進沈檀異木可構宮室者

敕江浙省驛致之庚辰諸王圖滿進所藏太宗玉璽進封
陽翟王癸未太陰犯熒惑遣使諭薛迷思千部冬十月癸
巳蒲縣陵縣地震甲午以阿沙不花知樞密院事罷大都
樞密辛丑太白犯南斗癸卯發湖廣米十萬石貯揚州江
西海漕米五萬石貯朱汪利津二倉濟山東饑甲辰加鐵
木爾不花錄軍國重事圖忽魯耶速脫孛花竝知樞密院
事以西僧教瓦班爲翰林承旨改護國仁王寺昭應規運
總管府爲會福院十一月庚申太白晝見增官吏俸以至
元鈔給之停其祿米歲省米四十萬石吏員以九十月出
身如舊制詔免被災田租凡佃戶止輸田主十分之四丁
卯中書省言銓選錢穀他司乞毋干預帝曰已降制書令
諸人勿干中書之政他日或有乘朕遺忘持內降文記及

傳旨至中書者其執之以來朕將加罪己已命托托爲左丞相耶爾吉尼爲御史大夫大慈都爲太子詹事以國用不給汰宣徽太府利用等院遣使覈天下屯田凡一百二十餘所令同行省宣慰官親履其地具籍以聞癸未皇太后造寺五臺山摘軍六千五百人供役閏月丙申罷江南進沙糖遼陽進雕豹止富民輸粟授官例乙巳詔虎符國之信器驛券使臣所需凡西域賈人名求珍異請給者概行追收丁未罷順德廣平鐵冶提舉司立汴梁之項城中都之開寧縣敕河西僧戶準先朝定制從軍輸稅一與民同甲寅故丞相哈剌合孫卒

典章云敕民開厚葬有用金銀寶玉器玩者以不孝治罪

十二月庚申封和郎撒爲隴王降隆興爲源州升蔚州爲蔚昌府省河東宣慰司以大同路隸中都畱守司冀寧晉

寧二路直隸中書省甲戌賜御史臺及監察御史宴服命有司贖饑民所鬻子女召吳澄爲國子監丞是歲月赤察爾進攻叛王子察巴爾諸部相率來降漠北平江浙饑振米五十三萬五千石鈔十五萬四千錠麪四萬斤又流民百三十三萬九百五十戶振米五十三萬六千石鈔十九萬七千錠鹽折直爲引五千令行省行臺遣官臨視益都水民饑采草根以食免今歲差徭仍以本路稅課及發朱汪利津兩倉粟振之

二年己酉春正月辛卯皇太子諸王百官上帝尊號曰統天繼聖欽文英武大章孝皇帝越王圖刺有罪賜死己亥封牀兀爾爲句容郡王乙巳追奪自大德六年至至大元年內降璽書不由中書直下翰林院頒給有干田土戶口

銓選獄訟害民妨政者凡六千三百餘道二月大赦癸亥
罷行泉府院以市舶歸行省己巳太陰犯亢辛未犯氏壬
申定各衛董屯田官三年一易三月己丑封諸王耶不干
爲襄寧王辛卯罷杭州白雲宗攝所立湖廣頭陀禪錄司
以和林屯糧去秋收至十萬石賞其官吏軍士有差戊戌
太陰犯氏己亥熒惑犯歲星夏四月辛酉立興聖宮江淮
財賦總管府癸亥摘漢軍五千給田十萬頃於直沽沿海
屯種立鎮守海口屯儲親軍都指揮司壬午創中都皇城
角樓五月丁酉以陰陽家言權停各寺及亭苑鷹房工役
甲辰敕自今乘輿北幸以丞相一人畱守京師著爲令六
月癸亥遣官督捕蝗典章云蝗不食豆苗勸民多種豌豆或取膈雪煮馬骨放水冷浴諸種子
生苗蝗亦不食禁諸賜田者馳驛徵租庚午選大都隸儒籍者四

十戶充文廟樂工甲戌以宿衛士多漢人南人投充避役
濫請衣糧敕遵舊制止存蒙古色目之有閥閱者餘並革
去乙亥宣政院奏免僧道耶里可溫荅失蠻租稅帝曰田
有租商有稅乃祖宗成法一體奏免非制依舊徵之秋七
月癸未河決歸德封壬辰松潘疊宕威茂等處安撫司
管內西番圖魯卜降胡漢民四種雜處遣官往蛇谷隴迷
招降其八部得萬七千戶改設宣撫司治茂州徙松州軍
鎮其地乙未復置龍南安遠二縣隸贛州己亥樂實請更
鈔法圖新鈔式以進且與保八謀立尙書省帝命與乞台
普濟塔思不花脫虎脫集議保八言政事得失皆前中書
省臣所爲今欲舉正彼懼有累孰願行者若立尙書省必
使舊事從中書新政從尙書力薦乞台普濟脫虎脫等任

其事塔思不花言此大事遽爾更張乞與老臣更議帝不從八月癸酉復立尙書省以乞台普濟爲右丞相脫虎脫爲左丞相三寶努樂實平章政事保八爲右丞忙哥鐵木爾爲左丞王熊郝彬參知政事立皇太子右衛率府志作年開事今依本紀載此詔修甘肅城城中多積金粟以給諸王軍馬復立瓜沙州屯田己卯三寶努言中書省尙有逋欠錢糧應追理者宜存斷事官十人餘皆并入尙書省其尙書省所用官六十四員中有品秩未相當或從未歷仕者乞弗拘例帝皆從之且敕天下敢有阻撓尙書省事者罪勿追九月庚辰朔頒尙書省條畫於天下曰三載攷績三攷黜陟幽明此古者責成悠久之道今路州司縣親民正官定以九年爲滿歲攷治功以示黜陟有撫字盡心百姓安阜

鈔法流通政事卓越者不次旌擢其不盡職而有私犯者懲以重罪至風教所行有關人心世道令所司表率敦勸以復淳古如有子證父奴訐主及妻妾弟姪干犯名義者一切究治其學校之設所以明人倫養賢才爲政之要莫先於此諸正官當躬親勉勵各得其才以備選舉凡在學儒生課講不輟者與免雜泛差役官府大小公事已立有限程民間詞訟尤當用心平允比來往往背公徇私變亂是非遲留不決以致民怨莫伸今後各務依理處斷毋得淹延歲月官僚執見不同者許各出所見申聞上司詳勘違者監察御史廉訪使糾治改各行中書省爲行尙書省頒行至大銀鈔詔曰昔我世祖旣登大寶始造中統交鈔以便民用歲久法墮亦旣更張印造至元寶鈔逮今又復

二十三年物重鈔輕不能無敝迺循舊典改造至大銀鈔頒行天下至大銀鈔一兩準至元鈔五貫白銀一兩黃金一錢隨路立平準行用庫買賣金銀倒換昏鈔或民間絲絲布帛赴庫回易驗時估給價諸路府州縣設立常平倉以權物價豐年廣收粟麥米穀值青黃不接之時減價出糶以遏沸涌金銀私相買賣及海舶興販金銀銅錢絲絲布帛下海者竝禁之中統交鈔詔書到日限一百日內盡數赴庫倒換茶鹽酒醋商稅諸色課程如收至大銀鈔以一當五頒行至大銀鈔自二兩至一釐定爲一十三等以便民用壬午江南行臺劾平章教化詭言家貧冒受賜物折鈔二萬錠且其人素無一善可稱命奪魏國公爵癸未從尙書省言省部諸務皆聽便宜處置大事或須上請得

旨卽行累朝格例前後不一吏得輕重任情自太祖以來
所頒政令九千餘條刪去繁冗編爲定制癸巳以大都城
南建佛寺立行工部令丞相脫虎脫兼領以冀寧大同保
定眞定當五台山建寺所須直取於民免今年田租己亥
罷中統鈔以至大銀鈔爲母至元鈔爲子仍撥至元鈔本
百萬錠以給國用初行錢法立資國院於大都泉貨監於
諸省以領之設提舉司十九於產銅之地鑄錢命以歷代
銅錢與至大錢相參通用從尙書省言三宮內降之旨仍
舊準行倘於大事有害則令復奏中書政務盡歸尙書省
聽其任人惟宣敕散官仍委中書海外占八國來貢白面
象伽藍木遣使分往不憐八孫八昔占八諸國甲辰立度
支院掌芻粟奪江南賜田千二百三十頃得租五十萬石

充官用禁貴戚家養豹冬十月庚戌朔大赦詔曰朕自臨御以來下詔萬方其所以撫安元元者亦已至矣而前歲江浙饑疫今年蝗旱相仍民或盡死幸生者流離道路雖嘗遣使分道振濟恐未能徧夫旣罹是天刑輕觸憲網者必眾有司概以重法繩之朕實憫焉其自十月日昧爽以前中外罪囚大辟以下已未發覺竝從釋免流民轉徙無常有司加意存恤遺骸暴露者官爲收瘞親民官不得取借部下錢債違者計贓論罪命皇太子兼尙書令丙辰從樂實言質江南富民子爲軍有歲收糧五萬石以上者每石輸二升於官半備凶年半養衛士辛酉弛酒禁立酒課提舉司癸亥以布里牙敦爲御史大夫乙丑皇太后有疾釋天下重囚壬申太陰犯左執法加知樞密院事圖忽魯

左丞相丁丑命阿散爲尙書左丞相伯都平章政事忽都
不丁爲右丞鐵里脫歡賈鈞竝中書參知政事戊寅御史
臺言常平倉本以益民然歲比不登立之必反害民至大
銀鈔初行品目繁碎民猶未曉又兼行銅錢慮有相妨民
閒拘銅器甚急弗便又歲凶乏食不宐遽弛酒禁不報發
御史臺贓鈔萬錠振山東饑改昔寶赤八刺合孫總管府
爲奉時院十一月庚辰朔以散朮帶爲平章政事商議樞
密院事己亥太陰犯右執法庚子犯上相發至大鈔二千
錠於江浙河南江西湖廣和糴得糧百萬石丙午諸王孛
蘭奚以私怨殺入當死帝曰國族也杖之流北鄙從軍丁
未擇衛上子弟充國子學生十二月乙卯帝親饗太廟加
上太祖聖武皇帝尊諡曰法天啟運光獻皇后曰冀聖

本傳

作至元二年上尊諡

容宗景襄皇帝曰仁聖莊聖皇后曰顯懿執事者人升散階一等賜太廟禮樂戶鈔帛有差武昌婦劉氏訴三寶努奪其所進亡宋玉璽夜光珠下省臺雜問得喬瑜誣捏狀命斬喬瑜杖劉氏庚申太陰犯參壬戌陽曲縣地震定內外官三品以上者許請諡若勳戚大臣特旨賜諡者不在此例

三年庚戌春正月癸未汰中書省官吏自客省使而下一百八十一員聽尙書省遷敘

通攷作三百員

乙酉徵李孟入見謂

宰臣曰此皇祖妣命爲朕賓師者特授平章政事同知樞密院事丁亥白虹貫日己丑以紐鄰參議尙書省事辛卯立皇后弘吉刺氏遣脫虎脫攝太尉持節授玉冊玉寶癸巳立中瑞司掌皇后寶司禮監管巫覡甲午太陰犯右執

法乙未制諸色課程自大德十一年較定舊額新增總爲正額折至元鈔作數以至大三年爲始恢辦餘止以十分爲率增及三分以上爲下酬五分以上爲中酬七分以上爲上酬九分者爲取不及三分者爲殿稅課官萬錠之上設正同副提舉各一員千錠之上設提領大使副使各二員五百錠以上半之百錠以上不設提領丙申復立廣平順德路鐵冶都提舉司湖廣乖西帶蠻阿馬等入寇乙巳省樞密院官存知樞密院七員同知院事二員副使二員僉事二員同僉院事一員增御史大夫中丞侍御史治書侍御史各二員省通政院官六員止存十二員二月辛亥熒惑犯月星己未浚會通河增大都警巡院分治四隅壬戌太陰犯左執法丁卯從尙書省言以至元鈔輸萬億庫

銷毀其板止以至大鈔與錢相權通行壬申以樂實爲尙書左丞相駙馬都尉封齊國公乙亥太白犯月星三月己卯朔定收支數目各以零就整至元鈔以釐爲止至大銀鈔以毫爲止斛以合爲止權以分爲止度以寸爲止其絲忽微塵秒撮圭粒等數竝行削去以省繁文庚寅太陰犯氏壬辰立興聖宮章慶司以江浙財賦府及瑞州營民司竝隸焉丙申太陰犯南斗丁未太白犯井夏四月己丑四川容米洞官田墨糾眾爲亂遣永順安撫使梓材往招之戊辰太白晝見改大承華普慶寺總管府爲崇祥監丙子增國子生爲三百員封諸王完者爲衛王六月丁未朔以幹赤爲中書左丞忽都不丁爲右丞己酉立上都中都及雲州銀冶提舉司庚戌立規運都總管領大崇恩福元寺

錢糧乙卯太陰犯氏丁巳諭脫虎脫三寶努總治百司庶務竝從尙書省奏行壬申遣使諸道慮囚秋七月戊寅太白犯右執法己卯犯上相封皇伯晉王長女寶荅失憐爲韓國長公主庚寅給親民長吏攷功印歷令監治官歲終驗其政績書而上之廉訪司御史臺尙書禮部攷校以定黜陟己亥禁權要商販挾聖旨懿旨令旨阻礙官河民船八月丁未以忽刺出釐日竝爲御史大夫甲寅白虹貫日九月己卯平伐蠻酋不老丁遣使來降卽其地立安撫司辛巳太陰犯建星辛卯犯天廩壬辰司徒劉夔乘驛至江南省親二年不歸詔削籍庚子帝諭尙書省曰去歲中書省奏請司官遵大德十年定制濫者汰之今員冗如故有不以聞而徑之任者有不奏而擅令之任者竝逮捕之朕

不輕釋冬十月甲辰朔太白經天丙午太白犯左執法定
今歲冬至祀圜丘尊太祖配來歲夏至祀方丘尊世祖配
朝日夕月於春秋二仲舉行其太廟祠祭故用瓦尊者以
銀代之戊申帝朝興聖宮上皇太后尊號曰儀天興聖慈
仁昭懿壽元皇太后癸丑熒惑犯亢甲寅諭中外民戶託
名諸王妃主規避徭役者俾充驛卒及築城夫郡縣官失
察者罷職丁巳詔減宮人膳尙書省言宣徽院廩給日增
儲待不給帝曰比見後宮飲饌與朕無異有是理邪其令
宣徽使覈實減之辛酉以皇太后受尊號赦天下大都上
都中都較他郡供給煩擾與免至大三年秋稅其餘至大
二年以前民欠錢糧悉從蠲免內外不急之役截日停罷
民間雜差先儘游食之徒次從工賈末技其力田之家勿

奪農時官民田土各有所屬諸人勿得陳獻民官公罪許
罰贖杖徒以下竝原宥從三寶努言省部官自今晨集暮
退怠者不俟奏聞便宐加罪其到任一二月卽辭病者杖
罷不敘發鈔二百錠規運取息以供尙書省膳丁卯封諸
王水八刺子買住韓爲堯王雲南省丞相鐵木迭爾擅離
職赴都有旨詰問以皇太后故貸免令復職以丞相帖古
迭爾爲陝西行臺御史大夫十一月甲戌朔太白犯亢辛
巳封三寶努楚國公加脫虎脫太師錄軍國重事封義國
公壬午改大崇恩福元寺規運總管府爲隆禧院丁亥太
陰犯畢戊子以益都寧海諸處連歲饑罷鷹房圍獵容米
洞田墨來降授黃沙寨千戶城中都丙申有事於南郊以
太祖皇帝配享昊天上帝五方帝日月星辰從祀己亥尙

書省以武衛都指揮使鄭阿爾思蘭段叔仁等圖不軌竝棄市十二月甲辰朔立崇輝署隸宣政院戊申冀寧路地震是歲襄陽陝州大水山崩壞官廨民居二萬一千八百閒死者三千四百餘人計口振糧兩月死者給以槥

四年辛亥春正月癸酉朔帝不豫大赦庚辰崩於玉德殿壽三十一壬午葬起輦谷夏五月上尊諡曰仁惠宣孝皇帝廟號武宗蒙古語曰曲律皇帝閏七月丙午祔於太廟論曰武宗始以懷寧王總兵漠北和林與叛王海都勁敵對壘屢摧其鋒中間幾瀕險危披堅陷陣威振遐荒可謂天潢之傑出天授之雄武矣入紹大統謂有宏圖而始終誤聽宵人以立尙書省爲營利之府何哉夫世祖立制以天下大政歸於中書省任相任賢責無旁貸故小人欲變

法忌中書不便於己則必別立尙書省以奪其權阿合馬桑葛之徒相繼亂政毒流海內是以世祖深戒前轍不復再蹈乃當席豐履厚之餘慨然欲變更至元大德之舊封爵太盛而遙授之官多錫賚太侈而濫賞之厄漏母后市恩左右撓其恭儉於是言利之臣迎合攘袂以爭利權雖柄操自上不至如阿合馬桑葛之甚而仁心仁聞漸蔽於功利幾同宋之熙豐故仁宗紹統翻然誅殛盡復舊章蓋變法不得其人則不如勿藥之尙得中醫也又攷陶九儀元氏掖庭記則瓊島水嬉之華月殿霓裳之豔亦自帝大濫其觴而本紀諱之不載一字亦英雄酒色之通病歟惟於授受之際堅守金匱傳弟之盟雖有內侍李邦寧慫慂離間帝言朕志已定汝自往東宮言之斯則磊落光明勝

宋太宗萬萬綜計始末固不失爲一代之英主焉